

玄教大公案序

下

道統之傳其來久矣始太上混元老祖以象先之妙強名曰道而立言以德輔翼之而五千言著其中然存言外之旨微妙玄通有不可得而言者深不可識亦強為形容焉自道德受關今尹子其十子各得其妙如列莊諸子至安期生李仙御葛仙翁衆真更相授受各有經典然枝分派列於洞天福地亦代不乏人自周漢以來惟尹子嗣祖位金闕帝君繼道統授東華帝君帝君傳正陽鍾離仙君鍾傳純陽呂仙君呂傳海蟾劉仙君劉南傳張紫陽五紫北傳王重陽七真道統一脉自此分而為二惟清菴李君得玉蟾白真人弟子王金蟾真人授受為玄門宗匠繼道統正傳以襲真明亦多典集見行于世實菴苗太素師事之心印其要蓋青出于藍而青于藍若也實菴抱負此道以列祖道統心法模範學人採撫諸經樞妙升堂入室舉其綱要於列祖言外著一轉語復頌彙之以易數為六十四則又入室三極則門弟子王誠菴輩集

成編名曰玄教大公案言言明本句句歸宗體用一真圓混三教使人於羲皇畫外縱橫玄聖象先游泳至哉華陽真逸唐公捐金繡梓以廣其傳義亦宏矣誠有決烈漢向此大公案外具無極眼睛觀得七穿八透豁然四達六通則道統明明相繼而無息豈不美歟

金陵淵嘿道人柯道冲敬序

无極天心中融萬法象先慧目圓燭無方性

至虛則八達六通心雲障則千差萬別是故

欲得豁開天外眼必先明了世間心僕幼習

儒業長慕玄風每研理性之元參究天道之

妙遍求愈遠默探愈深果謂不可得而聞也

夙生何幸得詣中和時闢寶菴老師法誨使

人累釋心清而造元返本神凝氣息而安命

樂天切切多方諄諄曲化一日中和上足出

示師之升堂入室舉演法海寶珍道統心法

詩頌目之曰玄教大公案備靜咀玩見其剖

判一元結絕萬法料撥群真骨髓貫通列祖

肝腸為人研慧切礪神鋒斬三尸誅六賊解

縛纏脫桎梏破愛疑網斷煩惱障活死漢救

生靈誘明達徹大用大機造極乘極奧優游

未始真樂無生其性理天道之妙明心見性

之機圓混于中一一明白誠此透徹豈果不

得聞歟然此亦皆師之緒餘耳僕既需受用

欣然不揣命工繡梓與天下福慧大丈夫同

向此按款中具一隻眼拶翻關撥粉破太虛

全本然反純朴逍遙无極嘯傲先天是所願

也金陵青溪九曲逸民唐道麟頓首謹識

聖仙至道體玄先天用妙萬法以精誠中息

而密固本元以謙敬和順而美利天下實菴

先生玄教大公案體用全彰行功圓備融一

真而入妙混萬理以歸元俾夫養元烝融冲

慧命寂本性安平道心偉乎美矣豈憂寂空

無機鋒口鼓一曲異端之比哉僕昔聞先生

補註伊川易傳三分未盡之肯默然驚嘆曰

伊川先生乃前宗六夫子中一夫子尚有未

盡今實菴先生補註其未盡是何人也恨不

能飛見偶授南臺職暇日與同僚三五特踵

中和相訪一見先生清寂安恬淡如也及乎

真敬請益雍容豁達隨問隨答的當通暢使

人廓如也又得觀補註易傳未盡及易網解
 或果謂辭簡理實純粹精明將俾等積年參
 學疑難一旦冰釋如大公案始一則將三教
 樞機精妙中正體用偏執見解已盡剖判中
 引諸經一事一理一玄一妙若對鏡觀形精
 粗圓照如云三身混極六慾沉空虛極反元
 動靜體道以寬慈養天性以儉約養道心以
 謙巽養玄德日用五音毒氣十般貞病至于
 舉兼山之良明靜止真功題目易之離明死
 生妄幻畫前至妙象外重玄兼養皇寶劍劈
 開列聖玄關現元始黍珠照徹群仙天谷實
 前代道儒宗師皆未嘗道可謂妙超今古玄
 混始終非先天之高明其孰能與于此宣聖
 云先天而天弗違信哉僕敢不師禮事之茲
 略序師之道德體用事實跡其先天一言前
 之妙在乎同志慧力綿密中之體式
 行臺監察御史王主敬從義頓首序引
 真金不懼火煅鍊愈精明美玉絕瑕琢磨
 成寶器朽木備鐵匠手難為故南華老仙云
 有聖人之才受聖人之道易矣或生而知之

者幾何人哉然夙根靈慧一徹萬融亦在乎
 明師提挈方可直超最上我輩福薄根鈍業
 力常勝道力大言直超頓徹恐亦自昧耳若
 從師匠鍊琢自誠明而虛通猶戒定而慧徹
 步步踏實地心體太空久久澄攬不濁懶
 磕不碎自然純粹堅固豈不美哉吾師實養
 仙翁道隆方外教闡環中發明太上心玄剖
 判義皇骨髓掀翻三教融混一元掃蕩邪宗
 豁開正道斷削後學造大本宗烹鍊高明達
 先天境是以良朋霞友雲集明公賢相風從
 虛而往實而歸誠不言而信近者悅遠者來
 咸無為而成乃知言未嘗言弘衆妙迥出思
 議之表道非常道備萬德獨立象帝之先非
 極高明而通至化者其孰能與于此僕日侍
 玄堂幸需法雨錄集升堂之珠玉緝熙入室
 之寶珍然義適多方理歸一極歷代聖仙未
 結絕案教吾師一一決斷明白目之曰玄教
 大公案列成六十四則以象周易六十四卦
 入室三極則以象三極誠有決烈漢直下承
 當煅鍊向中默會力行泯聲色淵識情瑩天

心開道眼頓超生滅耀徹古今大用大機咸
 備於斯其真樂奚可勝計哉誠能如是庶不
 負吾師誨諄之教亦乃千載一時之遇也雖
 然僕亦駕渡舟一夫云耳泰定甲子門弟子
 誠養王志道頓首敬序